

25. april 2019

UPA 2019 / 134

Umiarsuarmik ilaasartaammik umiarsuarmik Nanortalimmiit Upernavimmut angalasoqarsinnaasunngorlugu 2020-imiit ataatsimik umiarsualiisoqaqqinnissaanik sulissuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C. Jerimiassen, Atassut)

Nunatta sinersortaateqarnikkut kiffartuunneqarnerata suli annertusineqarnissaanik sulineq pimoorullugu sulissutigisariaqaripput Siumumi isumaqarpugut.

Nanortallip, Kangaatsiap, Qasigianguit Uummannap kiisalu Upernaviup sinersortaaitigut tikinneqaqqittalernissaat aatsaat taamak pingaaruteqartigilersutut oqaatigisariaqarpoq. Pinngortitarsuup nukingi, imarluk, avinngarusimasumiineq tikikkuminaassinnaanerlu tunngaviupput piffiit taakkua sinersortaateqarnikkut tikinneqaqqittalernerqartariaqarnerannut.

Imarluttartorsuummat umiarsuarmik isumannaatsumik tikinneqartarnissaq pingaarluinnarpoq, taamaammatt piffinni taakkunani innuttaasut angalaniarnikkut toqqissisimasumik atugaqalernissaat anguniarlugu sukataarutigalugu piviusunngortitsiniarluni sulineq ingerlaqqittariaqarpoq.

Nunatta kujaterpiaani innuttaasut atsiornernik katersititsinerat siorna upernaakkut naammassineqarpoq, innuttaasullu 630-init ikinnerunngitsut atsiornermikkut takutippaat sinersortaateqarnikkut atukkatigut qanoq kissaateqartiginerat.

Ukiorpaalussuannngortuni nunatta kujaterpiaa eqqarsaatigalugu qulimiguulik kisiat isumalluutigalugu angalaniarnikkut periarfissaqartitaasimavoq, naak siornamiit kiffartuussinerup nutaap imaatigut angalanissamik periarfissiinera pigaluartoq. Angallatilli Nanortallip Qaqortullu akornanni atornerqartut aasaanerani ajukkunnangikkaluaqisut imarluttalernerani isumalluutaasinnaajuaannnginnerat amerlasuutigut innuttaasut misigiuartaraat Siumumi arajutsisimangilarput.

Nanortalimmi nunaqarfittaaniilumi innuttaasut illoqarfinni allani innuttaasut assigalugit sinersortaamut toqqaannaq ikillutik angalaniarnikkut periarfissaqarnissaat sulissutigisariaqartoq Siumumi isumaqarpugut, taamaammallu siunnersuut manna partiinit tamanit Naalakkersuisuniillu tapersorsorneqarnissaa Siumumi pissusissamisoorluinnarsoraarput.

Taamatuttaaq Uummannap Upernaviullu sikuerneraniit sikuniarnissaata tungaanut sinersortaamik tikinneqaqqittalernissaat anguniagaasariaqartoq Siumumi isumaqarpugut. Tamanna taavani aamma innuttaasorpasuaranit kissaatigineqaqisoq tusartuarparput, taamatullu aamma qanittumi angallanneq pillugu isumasioqatigiititsinermi qinikkanit susasaqartuniillu aamma kissaatigineqartunut ilaalluinnarluni.

Akilersinnaassutsimik apeqqusersuisoqassappat pingaaruteqarpoq erseqqissaatigissallugu nunatsinni innuttaasut kisiisa isumalluutigalugit imartatigut angallassinermik ineriartortitsissannginnatta, tassami takornariaqarfissuannngornissamik siunertaqarpugut,

takornarissanullu nunarput kusanartorsuaq nittarsaatissagutsigu imaatigut sinersornikkut periarfissanik annertusaasariaqarpugut.

Naggataatigullu Siumumiit Naalackersuisut kaammattorusuppagut piffissaq aggersoq eqqarsaatigalugu Sarfaq Ittuup taartissaanik eqqarsalereeqqullugit suliasuareeqqullugillu, tassami umiarsuaq sukkaasoq isumannaatsorlu tassaasariaqarpoq sinerissatsinni kiffartuussisussaq pitsaanerpaaq. Siunnersuullu manna isumaqataaffigisinnaagaluarlugu Siumumi isumaqarpugut maanna umiarsuaq sinersortoq pisoqalilersorlu eqqarsaatigalugu taartissamik nutaaliaasumik pilersitsinissaq siunertaralugu sulisoqaaqqaartariaqartoq. Taannalu tassaasariaqarpoq Nanortalimmiit Upernavik tikillugu pilertortumik isumannaatsumillu angalasartussaq.

Siumumiit taamatut oqaaseqarluta siunnersuut manna Sanaartornermut ataatsimiititaliamut aappassaaneerinnineq sioqqullugu innersuunneqarnissaa kaammattuutigaarput.